

INUIT ATAQATIGIIT

INATSISARTUNI



25. januar 2011
13. august 2010

UPA 2011/22
UKA 2010/54

Inatsisartut suleriaasianni § 32 naapertorlugu aalajangiiffigisassatut siunnersuut imattoq matumuuna saqqummiuppar:

Piniartut aalisartullu piffissap ilaanni inuuniarnikkut ajornartorsiulernerminni pisortanit ikiorserneqarsinnaanerisa pitsaanerulernissaat siunertaralugu sulisoqarnissaanik Naalakkersuisut peqquneqarnissaannik Inatsisartut aalajagiffigisassaattut siunnersut.
(Inatsisartunut ilaasortaq Hans Aronen, Inuit Ataqatigiit)

Tunngavilersuut:

Ilaqtariit meeqqanik pilersugaqartut piffissap ilaanni inuuniarnikkut ajornartorsiuteqalersartut eqqarsaatigalugit oqallinnermi ilangullugit taaneqartarput ilaqtariit piniarnermik aalisarnermillu inuussutissarsiortumik pilersuisoqartut. Pisortanit ikorsiissutit pillugit inatsisartut peqqussutaat nr. 14, 20. november 2006-imeersoq kingusinnerusukkut allanngortinneqartoq malillugu piniartut aalisartullu ikiorserneqarsinnaanerat ajornannginnerulersimagaluartoq suli ajornartorsiutitaqarpooq.

Pisortanik ikorsiissutit pillugit inatsit nunami sulinermik inuussutissarsiutillit atugaat najoqqutarinerullugit ilusilersugaammat, piniarnermik aalisarnermillu inuussutissarsiutilinnut inuuniarnermi ajornartoornermi pisortanit ikiorneqarnissamik saaffiginninnermi ajornartorsiutissiisarpooq.

Ikorsiinermi annertussusiliineq SIK-p pisortallu akornanni nunami sulisut isumaqatigissutaat malillugit annertussusiligaapput, akiligassat aalajangersimasut suussanersut nunami aalajangersimasumik suliffeqartut akilersortagaat malillugit annertussusiligaallutik, aammalu nunami suliffeqalernissamut piareersimanissaannik piumasaqaatitaqarlutik.

Inuussutissarsiutigivillugu piniartut aalisartullumi ikiorserneqarnissamut piumasaqaatinik amerlasuutigut naammassinnissinnaasanngillat. Ukiariartornerani aammalu sikuusartumi sikuilernerani sila ullorpassuarni angallavissaajunnaaraangat piniarnermik aalisarnermillu inuussutissarsiuteqartut inuuniarnerminni meeqqaminnullu pilersuiniarnerminni ajornartoorsinnaasarput. Pisortaniillu ikorsiissutinik qinnuteqaraangamik nunami suliffeqalernissamut piareersimanissamut piumasaqaat naammassisinnaasanngilaat silagissippat aallaqqeriannaasaramik. Piniartummi aalisartullu silamik peqquteqartumik angalasinnaannginnerminni piniutigissartarput aammalu piniutitik nakkutigiuannartarlugit. Taamaammallu nunami suliffinnut suliartoriaannartut inissisimaneq ajorput, tamakkulu pissutigalugit pisariaqartitsivinnermi aammalu meeqqaminnut inuussutissamik pilersuiniarnerminni ikorsiissutinik qinnuteqarnerminni ajornartorsiortinneqartarlutik.

Ikiorssiinermi aamma piniartut aalisartullu nunami suliffilinnut sanilliullugit allaanerusunik aningaasartuuteqartarnerat eqqarsaatigineqarneq ajorpoq, angalaqqilernermermi orsussamut patroninut allanullu piniarnermi aalisarnermilu pisariaqartinneqartunut aningaasartuuteqartariaqarnerat eqqarsaatigineqaratilluunniit apeqquataatinneqarneq ajorput.

Siuunissami nunatta pissarititaannik pilersorneqarnissarput pisariaqartittuassagatsigu piniussisoqarnissarput aalisartoqarnissarpullu pisariaqartittuartussaavarput, taamaammat aamma ajornartuuinnermi pisortaniit ikiorserneqarsinnaanermut taakkununnga nunami suliffilittuulli naleqqussakkanik periarfissinneqartariaqarput.

Tamanna pisariaqartoq ersetseqqinnejqarpoq meeqqat kaattut pillugit Qaasuitsup kommuniani innuttaasunik oqallitsitsinermi.

Taamatut oqaaseqarlunga neriuutigaara siunnersuut pingaarutilittut isigisarput Inatsisartuni ilaasortanit ilassilluarneqassasoq.